

PWYLLGOR SGRIWTINI PARTNERIAETH AC ADFYWIO

Cofnodion y cyfarfod hybrid a gynhaliwyd ar 16 Medi 2025

YN BRESENNOL:	Y Cynghorydd Dylan Rees (Cadeirydd) Y Cynghorydd Gwilym O Jones (Is-gadeirydd) Y Cynghorwyr Douglas M Fowle, Euryrn Morris, Pip O'Neill, Derek Owen, Margaret Murley Roberts, Ken Taylor a Sonia Williams Mr John Tierney - Yr Eglwys Gatholig Rufeinig Ms Kathryn Seeney - Rhiant Lywodraethwr - Sector Ysgolion Cynradd Ms Christina Williams - Rhiant Lywodraethwr - Sector Ysgolion Uwchradd ac ADY
WRTH LAW:	Prif Weithredwr, Dirprwy Brif Weithredwr, Cyfarwyddwr Addysg, Sgiliau a Phobl Ifanc Pennaeth Democratiaeth, Rheolwr Sgriwtini (AD) Swyddog Pwyllgor (MEH), Swyddog Gweddarlledu Gwasanaeth Pwyllgorau (FT).
YMDDIHEURIADA U:	Y Cynghorwyr Non Dafydd, John Ifan Jones a Liz Wood Y Cynghorydd Dyfed W Jones - Aelod Portffolio Plant, Pobl Ifanc a Theuluoedd; Y Cynghorydd Dafydd Roberts - Aelod Portffolio Addysg a'r Gymraeg; Y Cynghorydd Robin Williams - Dirprwy Arweinydd ac Aelod Portffolio Cyllid a Gwasanaethau Tai. Mrs Wenda Owen - Yr Eglwys yng Nghymru
HEFYD YN BRESENNOL:	Aelodau Portffolio Y Cynghorydd Gary Pritchard - Arweinydd y Cyngor ac Aelod Portffolio Datblygu Economaidd; Y Cynghorydd Neville Evans - Aelod Portffolio Hamdden, Twristiaeth a Morwrol; Y Cynghorydd Alun Roberts - Aelod Portffolio Gwasanaethau Oedolion a Diogelwch Cymunedol; Y Cynghorydd Nicola Roberts - Aelod Portffolio Cynllunio, Gwarchod y Cyhoedd a Newid Hinsawdd.

Croesawodd y Cadeirydd Ms Kathryn Seeney - Rhiant Lywodraethwr - Sector Ysgolion Cynradd, a Ms Christina Williams - Rhiant Lywodraethwr Uwchradd ac ADY i'r cyfarfod. Pleidleisiodd y Pwyllgor i dderbyn penodiad y ddau Rhiant Lywodraethwr ar y Pwyllgor Sgriwtini Partneriaeth ac Adfywio.

1 YMDDIHEURIADAU:

Fel y nodir uchod.

2 DATGANIAD O DDIDDORDEB

Bu i'r Cynghorydd Douglas M Fowlie ddatgan diddordeb personol mewn perthynas ag eitem 5 - Cydweithio â Choleg Menai, gan fod aelod o'i deulu'n cael ei gyflogi gan Grŵp Llandrillo Menai.

3 COFNODION

Cadarnhawyd bod cofnodion y cyfarfod blaenorol a gynhaliwyd ar 15 Gorffennaf 2025 yn gywir.

4 CYDWEITHIO Â PHRIFYSGOL BANGOR

Croesawodd y Cadeirydd yr Is-Ganghellor Edmund Burke, yr Athro Paul Spencer, yr Athro Enlli Thomas a Mr Chris Drew i'r cyfarfod.

Rhoddodd gynrychiolwyr o Brifysgol Bangor gyflwyniad cryno i weddill y cyfarfod yn amlinellu gwaith y Brifysgol a'r trefniadau gwaith gyda'r awdurdod lleol i ddarparu prosiectau arloesol ar yr Ynys. Atodwyd copi o'r cyflwyniad i agenda'r cyfarfod hwn.

Yn dilyn y cyflwyniad, codwyd y pwyntiau trafod a ganlyn gan y Pwyllgor:

- Gofynnwyd cwestiynau ynghylch sut mae'r cyfyngiadau ariannol presennol yn effeithio ar amrywiaeth o gyrsiau'n cael eu cynnig ym Mhrifysgol Bangor, ac i ba raddau mae gostyngiad yn nifer y cyrsiau'n cael eu hystyried, yn enwedig y cyrsiau hynny yn y maes Gwasanaethau Cymdeithasol. Dywedodd yr Is-ganghellor, er bod arbedion cyllidebol wedi'u gwneud, nid oes unrhyw Ysgol nag Adran wedi cau yn y Brifysgol. Nid effeithiwyd fawr ddim ar gyrsiau yn yr Ysgolion Meddygaeth ac Iechyd, Gwyddoniaeth a Pheirianneg. Mae gostyngiad sylweddol wedi bod yn nifer y cyrsiau sydd ar gael yn yr Ysgol Gwyddorau Cymdeithasol, y Celfyddydau, Dyniaethau ac Ieithoedd Modern (mae gostyngiad yn astudiaethau rhai ieithoedd wedi'u gwneud oherwydd nifer y myfyrwyr sydd eisiau dilyn y cyrsiau hyn). Rhoddodd yr Athro Enlli Thomas sicrwydd nad oes gostyngiad wedi bod yn nifer y cyrsiau dwyieithog sy'n cael eu cynnig gan y Brifysgol, ac mae ymrwymiad i sicrhau bod cyrsiau dwyieithog yn dal i gael eu cynnig.
- Cyfeiriwyd at yr angen am gyrsiau Therapi Galwedigaethol a Seicoleg Addysgol gan fod prinder staff dwyieithog cymwys yn ymgeisio am swyddi gydag awdurdodau lleol. Cyfeiriodd yr Athro Enlli Thomas at y prinder gweithwyr

Seicoleg Addysgol a Therapi Galwedigaethol proffesiynol cymwys, dwyieithog, ac er bod angen buddsoddiad ariannol i gynnal y cyrsiau hyn, mae'r Brifysgol yn barod i drafod gydag awdurdodau lleol yn y rhanbarth.

- Er y croesewir yr Ysgol Feddygol a Hylendid Deintyddol ym Mhrifysgol Bangor, codwyd cwestiynau ynghylch a yw'r myfyrwyr sy'n hyfforddi yn aros yn yr ardal leol. Dywedodd Mr Chris Drew o hanner y myfyrwyr, sef 20, fod 10 wedi cael gwaith gyda Bwrdd Iechyd Prifysgol Betsi Cadwaladr, a bod 10 wedi cael gwaith gyda'r GIG yng Nghymru. Nododd fod Cwrs Sylfaen wedi'i sefydlu er mwyn cyflwyno llwybr i fyfyrwyr o Gymru ymuno â'r rhaglen feddygaeth. Mae'n fwy heriol cadw myfyrwyr i weithio yn y sector deintyddol o fewn y GIG gan fod y sector preifat yn gallu fforddio buddion ar gyfer deintyddion. Dywedodd yr Is-ganghellor fod gwaith yn mynd rhagddo i gyflwyno Ysgol Deintyddiaeth yn y rhanbarth.
- Holwyd am ganran y myfyrwyr o ogledd Cymru sy'n astudio ym Mhrifysgol Bangor. Dywedodd yr Is-ganghellor fod cynnydd wedi bod yn nifer y myfyrwyr o ogledd Cymru sy'n dewis astudio ym Mhrifysgol Bangor, o ganlyniad i gynrychiolwyr o'r Brifysgol yn mynychu ysgolion a cholegau lleol i amlygu'r buddion o astudio ym Mhrifysgol Bangor. Mae bron i 1,500 o fyfyrwyr o ogledd Cymru a 781 o ogledd-ddwyrain Cymru.
- Gofynnwyd cwestiynau ynghylch sut mae'r Brifysgol yn alinio'r cryfderau ymchwil gyda'r sgiliau sydd eu hangen ar bobl ifanc a chyflogwyr lleol. Dywedodd Paul Spencer fod trafodaethau'n mynd rhagddynt gyda chyflogwyr mawr mewn perthynas â'r budd cyflenwi a drwy'r Bartneriaeth Sgiliau Rhanbarthol a'r diwydiant Morwrol. Mae gwaith hefyd yn mynd rhagddo gydag awdurdodau lleol mewn perthynas â datblygiadau mawr posibl yn y rhanbarth.
- Gofynnwyd cwestiynau ynghylch sut all y Brifysgol a Grŵp Llandrillo Menai weithio gyda'i gilydd i fynd i'r afael â'r bwlch sgiliau yn y rhanbarth yn enwedig yn y sector iechyd, gofal cymdeithasol a chyfreithiol. Dywedodd yr Is-ganghellor fod gwaith sylweddol wedi digwydd rhwng y Brifysgol ac ysgolion lleol, Grŵp Llandrillo Menai, Prifysgol Wrecsam a Choleg Cambria i drafod y llwybr sydd ar gael i fyfyrwyr tuag at ofynion sgiliau ymhlith cyflogwyr lleol. Bydd angen cyllid er mwyn datblygu llwybrau myfyrwyr.
- Cyfeiriwyd at y ffaith y gall DA (Deallusrwydd Artiffisial) drawsnewid y ffordd mae llywodraeth leol yn gweithio yng Nghymru, ond mae'n hollbwysig fod yr iaith Gymraeg yn rhan o dechnoleg DA. Dywedodd yr Athro Paul Spencer y cwblheir ymchwil mewn perthynas â sut ellir darparu technegol DA yn ddwyieithog. Dywedodd y bydd trafodaethau'n mynd rhagddynt gyda Bwrdd Iechyd Prifysgol Betsi Cadwaladr a Chyfoeth Naturiol Cymru mewn perthynas â darpariaeth ddigidol. Gobeithir y bydd technegol DA yn cael ei ymgorffori yn y cyrsiau sydd ar gael yn y Brifysgol, ac i weithio yn agos gyda chwmnïau megis Msparc.
- Cyfeiriwyd at y ffaith fod y Brifysgol wedi gorfod gwneud arbedion ariannol, gyda 200 o staff yn colli eu swyddi. Gofynnwyd a fydd datblygiad technoleg DA yn arwain at gyflogi staff cymorth yn y dyfodol. Dywedodd yr Athro Paul Spencer y bydd technoleg DA yn trawsnewid gwasanaethau yn y dyfodol, ond ei fod yn hollbwysig nad yw data sy'n cael ei fewnbynnu i system DA yn mynd yn groes i ddeddfwriaeth a llywodraethiant data, a bod rhaid rhoi strwythur ar waith. Dywedodd y Prif Weithredwr fod yr Awdurdod yn edrych ar ddyfodol DA mewn gwasanaethau sy'n cael eu darparu gan y Cyngor, yn ogystal â buddsoddi yn y meysydd hynny fydd yn cael effaith ac yn cynnig buddion hirdymor. Er y

derbynnir y buddion, mae risgiau ynghlwm â seiberddiogelwch wrth golli data personol. Roedd yn croesawu trafodaethau gyda'r Brifysgol mewn perthynas â dyfodol DA.

- Gofynnwyd a oes gan y Brifysgol bolisi recriwtio a chanran y siaradwyr Cymraeg sy'n gweithio i'r Brifysgol. Dywedodd yr Athro Enlli Thomas fod 43% o weithwyr yn siaradwyr Cymraeg rhugl a bod 20% ychwanegol yn meddu ar sgiliau iaith Gymraeg ac yn dysgu Cymraeg. Mae gan y Brifysgol bolisi recriwtio gyda thair strwythur gwahanol yn amlinellu'r gallu ieithyddol ar gyfer bob swydd. Nododd fod y polisi recriwtio yn cael ei adolygu ei mwyn cryfhau'r polisi o ran sgiliau iaith Gymraeg.
- Gofynnwyd sut mae colli cyllid o Ewrop wedi effeithio ar y Brifysgol. Dywedodd yr Is-ganghellor fod y Brifysgol wedi colli £10m o gyllid strwythurol Ewropeaidd. Dywedodd yr Athro Paul Spencer fod rhan helaeth o'r gronfa strwythurol Ewropeaidd yn cael ei ddefnyddio i gefnogi gwaith adeiladu ac adnewyddu, a diweddarau offer yn Msparc, Gaerwen. Dywedodd ei fod wedi dod yn fwy cystadleuol i ddod o hyd i gyllid gan y Llywodraeth ar gyfer Prifysgolion.
- Gofynnwyd sut mae'r Brifysgol yn alinio ei gyrsiau er mwyn cefnogi'r sgiliau a'r cymwysterau sydd eu hangen ar gyfer swyddi'n ymwneud â'r Porthladd Rhydd. Dywedodd yr Athro Paul Spencer fod hynny'n dibynnu ar y math o fusnesau fydd yn cael eu denu i'r Porthladd Rhydd. Mae cyrsiau datblygu sgiliau digidol a sgiliau'r sector ynni ar gael yn y Brifysgol. Bydd gwaith yn mynd rhagddo gyda Cholegau Lleol fydd yn gallu fforddio prentisiaethau ar gyfer pobl ifanc. Dywedodd y Prif Weithredwr y bydd cyfleoedd ar gael yn y maes Peirianeg a Technegol. Dywedodd fod y Memorandwm Cyd-ddealltwriaeth wedi'i lofnodi ar gyfer statws y Porthladd Rhydd gyda chyfanswm o £25 miliwn yn cael ei gyfrannu a'i ddefnyddio i adeiladu ar Safleoedd Msparc a Peboc, ac i wneud gwelliannau ar strwythur y ffordd yng ngogledd yr Ynys. Gofynnwyd cwestiynau pellach ynghyd a fydd DA yn effeithio ar gyfleoedd gwaith sy'n gysylltiedig â'r Porthladd Rhydd. Dywedodd y Prif Weithredwr y bydd Canolfannau Data'n cael eu codi ledled Prydain, a bydd parc technegol yn dod i hen safle Anglesey Aluminium yn Nghaergybi.

Diolchodd y Cadeirydd i'r Is-ganghellor a'r cynrychiolwyr o'r Brifysgol am fynychu'r cyfarfod.

PENDERFYNWYD nodi'r sylwadau a dderbyniwyd yn ystod y drafodaeth.

5 CYDWEITHIO Â GRŴP LLANDRILLO MENAI

Croesawodd y Cadeirydd Mr Aled Jones-Griffith, Prif Weithredwr Grŵp Llandrillo Menai i'r cyfarfod.

Cafwyd cyflwyniad yn ystod y cyfarfod gan Mr Aled Jones-Griffith, Prif Weithredwr Grŵp Llandrillo Menai yn amlinellu gwaith a wnaed gan y coleg drwy drefniadau cydweithio gyda'r awdurdod lleol i ddarparu prosiectau arloesol ar yr Ynys. Atodwyd copi o'r cyflwyniad i agenda'r cyfarfod hwn.

Yn dilyn y cyflwyniad, codwyd y pwyntiau trafod a ganlyn gan y Pwyllgor:

- Nodwyd bod diffyg crefftwyr yn y diwydiant adeiladu. Gofynnwyd gwestiynau am gyfanswm y bobl ifanc sy'n mynychu cyrsiau adeiladu yn y Coleg, ac a oes unrhyw enethod yn dangos diddordeb yn y cwrs. Dywedodd Mr Jones-Griffith fod gostyngiad wedi bod yn nifer y myfyrwyr sy'n dilyn cyrsiau adeiladu yn y Coleg, gan ei bod yn heriol cael prentisiaethau ar gyfer y bobl ifanc hyn. Dywedodd fod denu genethod i'r diwydiant yn her. Cynigiwyd cwrs STEM gyfochr â chwrs adeiladu ychydig flynyddoedd yn ôl gyda chefnogaeth yr awdurdod lleol. Dywedodd y byddai'n rhannu niferoedd y bobl sy'n dilyn cyrsiau adeiladu i aelodau'n fuan. Gofynnwyd cwestiynau pellach ynghylch a yw Grŵp Llandrillo Menai yn mynychu ysgolion uwchradd i dynnu sylw at y cwrs adeiladu sydd ar gael. Dywedodd Mr Jones-Griffith fod trafodaethau'n mynd rhagddynt gyda'r awdurdod lleol a Chonsortia Addysgiadol Gwynedd a Môn, mewn perthynas â darpariaeth 14 i 16. Cyfeiriodd at y Dystysgrif Alwedigaethol fydd ar gael yn 2027, fydd yn galluogi myfyrwyr i astudio pynciau galwedigaethol ynghyd â TGAU. Nododd fod y cyfleusterau ar gael yn y Coleg heb i ysgolion uwchradd orfod buddsoddi mewn darpariaeth o'r fath.
- Gofynnwyd cwestiynau am weledigaeth Grŵp Llandrillo Menai mewn perthynas ag addysg ôl-16 ar Ynys Môn. Dywedodd Mr Jones-Griffith fod trafodaethau'n parhau gyda'r awdurdod lleol i sicrhau fod mynediad at gyrsiau galwedigaethol, lefel A a phrentisiaethau yn y Coleg. Nododd fod modelau gwahanol mewn perthynas ag addysg ôl-16 ledled y wlad, gyda nifer o opsiynau ar gael. Mae nifer o gyrsiau lefel A ar gael ar gampws Llangefni ar gyfer myfyrwyr, gyda'r mwyafrif yn cael eu darparu drwy'r Gymraeg. Gofynnwyd cwestiynau pellach ynghylch canran y bobl ifanc sy'n dilyn cyrsiau lefel 'A' yng Ngholeg Menai ac a all y Coleg fod yn gyfrifol am ddarparu addysg ôl-16 ar Ynys Môn. Dywedodd Mr Jones-Griffith fod 30 myfyriwr yn astudio cyrsiau UG a bod 20 myfyriwr yn astudio cyrsiau lefel A yn Coleg Menai eleni. Dywedodd bod lle ar gyfer cyfleuster addysg ôl-16 ar gampws Coleg Menai, Llangefni a byddai Grŵp Llandrillo Menai'n barod i drafod unrhyw opsiynau eraill pe byddai darpariaeth bellach yn dod i'r Ynys. Gall y Coleg gynnig astudiaethau galwedigaethol ynghyd â chysiau lefel A i fyfyrwyr.
- Cyfeiriwyd at safle Wylfa a'r posibilrwydd am gyfleoedd gwaith os gwneir cyhoeddiad y bydd darpariaeth niwclear ar y safle. Nodwyd bod Rolls-Royce, y partner a ffafrir ar gyfer SMRau posibl ar y safle, wedi dweud y byddant yn hyfforddi gweithwyr posibl yn fewnol yn hytrach na'u hyfforddi mewn Colegau lleol. Dywedodd Mr Jones-Griffith fod trafodaethau wedi bod yn mynd rhagddynt gyda Rolls-Royce yn pwysleisio'r angen i ddarparu cyfleoedd hyfforddiant yn lleol drwy Brifysgol Bangor a Grŵp Llandrillo Menai.
- Cyfeiriwyd at ddarparu hyfforddiant yn Gymraeg i bobl ifanc mewn perthynas â chyfleoedd gwaith lleol posibl. Nodwyd y bydd hyn yn cefnogi pobl ifanc lleol i aros ar yr Ynys. Gofynnwyd cwestiynau ynghylch faint o amser a gymerir i hyfforddi pobl ar gyfer y swyddi posibl hyn. Dywedodd Mr Jones-Griffith ei fod yn cymryd oddeutu 3 mlynedd i hyfforddi pobl ac mae gan fusnesau megis Rolls-Royce eu rhaglenni hyfforddi eu hunain.
- Gofynnwyd cwestiynau ynghylch faint o fyfyrwyr sy'n astudio Peirianeg Forwrol a Thechnoleg Forwrol. Dywedodd Mr Jones-Griffith y byddai'n darparu'r wybodaeth i Aelodau'n fuan. Gofynnwyd cwestiynau pellach ynghylch cludo myfyrwyr i ddilyn cyrsiau ar gampws Grŵp Llandrillo Menai. Dywedodd Mr Jones-Griffith bod cludiant ôl-16 ar gael i fyfyrwyr fynychu cyrsiau. Dywedodd fod Llywodraeth Cymru wedi cyhoeddi y gall pobl ifanc rhwng 16 a

21 oed deithio am £1 bob ffordd ledled Cymru er mwyn mynychu cyrsiau coleg o fis Medi 2025 ymlaen.
Diolchodd y Cadeirydd i Mr Alwed Jones-Griffith, Prif Weithredwr Grŵp Llandrillo Menai am fynychu'r cyfarfod.

PENDERFYNWYD nodi'r sylwadau a dderbyniwyd yn ystod y drafodaeth.

6 AELODAETH PANELAU SGRIWTINI

Cyflwynwyd - adroddiad gan y Rheolwr Sgriwtini.

Dywedodd y Pennaeth Democrataidd fod yr Arweinyddion Grŵp wedi cytuno y dylai'r 3 Panel Sgriwtini fod yn gytbwys yn wleidyddol. Adolygwyd Cylch Gorchwyl y 3 Panel Sgriwtini ac maent wedi'u hatodi i'r adroddiad. Dywedodd fod y ddau Bwyllgor Sgriwtini angen enwebu 1 Aelod i wasanaethu ar y Grŵp Llywio Iaith Gymraeg a Chydraddoldeb.

PENDERFYNWYD :-

- Cytuno ar drefn aelodaeth ddiwygiedig ar gyfer y 3 Phanel Sgriwtini yn seiliedig ar gydbwysedd gwleidyddol cyfredol y Cyngor;
- Cytuno Cylch Gorchwyl ar gyfer y 3 Phanel Sgriwtini;
- Bod y Cyngorydd Non Dafydd yn cael ei henwebu gan y Pwyllgor Sgriwtini Partneriaeth ac Adfywio i wasanaethu ar y Grŵp Llywio'r Gymraeg a Chydraddoldeb.

7 BLAEN RAGLEN WAITH Y PWYLLGOR 2025/2026

Cyflwynwyd, i'r Pwyllgor ei ystyried, adroddiad y Rheolwr Sgriwtini a oedd yn manylu ar Flaen Raglen Waith y Pwyllgor Sgriwtini Partneriaeth ac Adfywio ar gyfer 2025/2026.

PENDERFYNWYD cytuno'r fersiwn gyfredol o'r Flaen Raglen Waith ar gyfer 2025/26, gan gynnwys y newidiadau a nodwyd.

Daeth y cyfarfod i ben am 4.00 pm

Y CYNGHORYDD DYLAN REES

CADEIRYDD